

CYFARFOD	Pwyllgor Craffu Cymunedau
DYDDIAD	12/09/2024
TEITL	Ffioedd Parcio
RHESWM DROS GRAFFU	Blaengraffu 1. I weithredu cynlluniau arbedion 2. I ystyried opsiynau i gyfarch y diffyg rhwng y targed incwm parcio a'r hyn sydd yn cael ei wireddu
AWDUR	Gerwyn Jones, Pennaeth Adran Cynorthwyol Adran Amgylchedd
AELOD CABINET	Y Cyngorydd Dafydd Meurig, Aelod Cabinet Amgylchedd

1. Pam fod angen ei graffu?

- 1.1 I alluogi'r Gwasanaeth Parcio fwrw ymlaen i wireddu dau gynllun arbedion sydd wedi eu cymeradwyo gan Gabinet y Cyngor yn 2023/24.
- 1.2 I alluogi'r Gwasanaeth Parcio fwrw mlaen i wireddu dau gynllun arbedion sydd angen ystyriaeth bellach cyn dod i benderfyniad terfynol yn 2024/25.
- 1.3 I lywio penderfyniad o ganlyniad i ddiffyg sylweddol yng nghyllideb y Gwasanaeth Parcio.

2. Beth yn union sydd angen ei graffu?

Cynlluniau Arbedion 2023/24

- 2.1 Mae'r cynlluniau arbedion canlynol wedi eu cymeradwyo gan y Cabinet yn 2023/24:
 - Cynyddu ffioedd parcio Pen y Gwryd
 - Cynyddu pris Tocyn Parcio Blynyddol a Thocynnau Parcio Lleol meysydd parcio o £5 y flwyddyn.

Cynlluniau Arbedion 2024/25

- 2.2 Mae'r cynlluniau arbedion canlynol angen ystyriaeth bellach cyn dod i benderfyniad terfynol:
 - Ymestyn Oriau Gorfodaeth Parcio ym Meysydd Parcio Arhosiad Byr y Cyngor
 - Addasiad i Strwythur Ffioedd Arhosiad Hir Band 2

Diffyg yn y Gyllideb

- 2.3 Drwy graffu'r mater gan roi ystyriaeth i'r cyd-destun ariannol ac ystyried opsiynau posib o ran codi ffioedd parcio yn gyffredinol a'r syniad o'u codi'n flynyddol ar sail chwyddiant, gall y Pwyllgor wneud argymhellion i'r Cabinet er ystyriaeth cyn gwneud penderfyniad.

3. Crynodeb a'r Materion Allweddol

- 3.1 Mae'n anorod i'r Cyngor wireddu arbedion a thoriadau sylweddol ynghyd a chynyddu lefel treth Cyngor er mwyn cyfarch bwch ariannol dwys sydd yn y cyllidebau.
- 3.2 Bu i wasanaethau ar draws y Cyngor gyflwyno cynlluniau arbedion oedd gyfwerth a 20% o'u cyllidebau mewn ymgais i leddfu'r sefyllfa gyllidol hynod heriol sydd yn ein hwynebu.
- 3.3 Cafodd rhai o'r cynlluniau yma eu derbyn y llynedd, ac ers hynny, mae'r holl gynlluniau oedd yn weddill wedi bod yn sail trafodaethau a gweithdai mewnol.

Cynlluniau Arbedion 2023/24

- 3.4 Gweler isod ddau o'r cynlluniau a gyflwynwyd gan y Gwasanaeth Parcio sydd wedi derbyn cymeradwyaeth gan Gabinet y Cyngor yn 2023/24 ynghyd a gwedd cyntaf cynigion arbedion a thoriadau'r Cyngor. Er hyn, a gan ystyried bod y pwnc yn hynod gynhennus, teimlwn ei bod yn briodol cyflwyno'r cynlluniau ger bron y Pwyllgor Craffu.

Teitl y Cynllun	Amcan Cyfanswm Incwm ychwanegol
Cynyddu ffioedd parcio Pen y Gwryd	£40,000
Cynyddu pris Tocyn Parcio Blynyddol a Lleol meysydd parcio o £5 y flwyddyn	£17,000
Cyfanswm:	£57,000

Cynlluniau Arbedion 2024/25

- 3.5 Gweler isod ddau o'r cynlluniau a gyflwynwyd gan y Gwasanaeth Parcio sydd angen ystyriaeth bellach a chymeradwyaeth gan Aelodau Cabinet y Cyngor er mwyn galluogi'r gwasanaeth i fwrw mlaen gyda'r trefniadau a chychwyn gwireddu'r cynnydd mewn incwm posibl:

Teitl y Cynllun	Amcan Cyfanswm Incwm ychwanegol
Addasiad i Strwythur Ffioedd Arhosiad Hir Band 2	£160,000
Ymestyn Oriau Gorfodaeth Parcio ym Meysydd Parcio Arhosiad Byr y Cyngor	£78,000
Cyfanswm:	£238,000

Diffyg yn y Gyllideb

- 3.6 Caiff chwyddiant cyfansawdd ei ychwanegu ar darged incwm ffioedd parcio ar gychwyn pob blwyddyn ariannol. Mae cynnydd sylweddol yn y targed yn golygu nad ydi'r incwm a gynhyrchwyd bellach yn cyrraedd y targed a osodir. O ganlyniad, mae'n creu'r argraff od gorrariant sylweddol yng nghyllidebau'r gwasanaeth.
- 3.7 Rhagwelir byddai angen cynyddu ffioedd parcio rhwng 30% a 40% er mwyn cyrraedd targed incwm sydd angen ei gyfarch gan ffioedd parcio o feysydd parcio talu ac arddangos yr Adran Amgylchedd.
- 3.8 Rhagwelir byddai cynyddu ffioedd parcio 40% yn ddigonol ar gyfer cyfarch y cynnydd chwyddiant disgwylidig hyd at flwyddyn ariannol 2028-2029.

4. Cefndir / Cyd-destun

- 4.1 Sefydlwyd Grŵp Tasg Parcio ym mis Gorffennaf 2019 i ymgymryd ag adolygiad cynhwysfawr o'r strategaeth parcio weithredol ac ystyried ei addasrwydd a pherthnasedd i anghenion y Cyngor ac anghenion ein cymunedau erbyn heddiw.
- 4.2 Roedd y Grŵp Tasg yn cynnwys pedwar aelod lleol ar y pryd, Cynghorydd Angela Russell; Cynghorydd Annwen Hughes; Cynghorydd Kevin Morris Jones a Chynghorydd Gethin Glyn Williams a fu gydweithio'n adeiladol gyda Dafydd Wyn Williams, Pennaeth Adran Amgylchedd a swyddogion eraill o'r Adran.
- 4.3 Roedd polisïau a gweithdrefnau parcio'r Cyngor wedi aros yr un fath fwy neu lai ers 2015 felly manteisiwyd ar y cyfle i argymhell gwelliannau oedd yn cydweddu gyda'r sefyllfa economi leol ac uchafu'r defnydd o feddalwedd sydd bellach ar gael. Roedd adolygu'r trefniadau hefyd yn anorfod yn nhermau cynaliadwyedd ariannol o ran cyllidebau'r awdurdod er sicrhau bod ein trefniadau rheoli ymarferol yn effeithiol ac yn effeithlon.
- 4.4 Cyflwynwyd adroddiad cynhwysfawr i'r Pwyllgor Craffu Cymunedau ym mis Rhagfyr 2020 yn cynnig argymhellion priodol ar gyfer datrys mwyafrif o'r materion. Yn ddilynol i hwn, aeth adroddiad terfynol ger bron Aelodau'r Cabinet ym mis Chwefror 2021 gyda'r argymhellion isod yn cael eu cymeradwyo:

1. Mabwysiadu Strwythur Ffioedd Parcio Newydd yn seiliedig ar y bandiau isod:

Band	Meini Prawf
Band 1	Canolfan Isranbarthol a'r Canolfannau Manwerthu Trefol (Darparu'r ystod orau o wasanaethau, cyfleoedd cyflogaeth a mynediad i drafnidiaeth gyhoeddus)
Band 2	Canolfannau Manwerthu a Gwasanaethu Lleol (darparu ar gyfer anghenion gwasanaeth hanfodol eu poblogaeth eu hunain a'r dalgylchoedd gwledig cyfagos, ynghyd â rhywfaint o gyfleoedd cyflogaeth a manwerthu. Mae ganddynt raddfa dda o hygyrchedd trwy gludiant cyhoeddus i'r Canolfannau rheng uwch)
Band 3	Meysydd Parcio Tymhorol

2. Adolygu cynnig parcio yn ystod cyfnod y Nadolig
3. Dim newidiadau i'r Cynllun Bathodyn Glas
4. Dim newidiadau i'r Cynllun Parcio i Breswylwyr
5. Cryfhau'r Tîm Gorfodaeth Parcio

4.5 Mae'r argymhellion a restrwyd uchod wedi'u gweithredu.

Cynlluniau Arbedion

4.6 Fel y soniwyd uchod, ar dro'r flwyddyn 2023 bu i wasanaethau ar draws y Cyngor gyflwyno cynlluniau arbedion oedd gyfwerth a 20% o'u cyllidebau mewn ymgais i leddfu'r sefyllfa gyllidol hynod heriol sydd yn ein hwynebu.

4.7 Mae'r adroddiad hwn yn canolbwyntio ar y pedwar cynllun isod:

- **Cynyddu ffioedd parcio Pen y Gwryd**
- **Cynyddu pris Tocyn Parcio Blynnyddol a Lleol meysydd parcio o £5 y flwyddyn**
- **Addasiad i Strwythur Ffioedd Arhosiad Hir Band 2**
- **Ymestyn Oriau Gorfodaeth Parcio ym Meysydd Parcio Arhosiad Byr y Cyngor**

Cynyddu ffioedd parcio Pen y Gwryd

4.8 Mae gan y Cyngor ddarpariaeth parcio talu ac arddangos yn ardal Pen y Gwryd. Yn wahanol i feysydd parcio'r Cyngor, mae'r ddarpariaeth parcio hwn gyfochrog â'r briffordd ac felly wedi'i lywodraethu gan orchymyn parcio ar y ffordd.

4.9 Mae'r un ffioedd wedi bodoli yn y lleoliad ers blynnyddoedd, sef £2.00 am hanner diwrnod a £4.00 am ddiwrnod llawn. Wrth edrych ar weddill ffioedd ledled y Sir, teimlwn ei bod yn rhesymol ac amserol cynyddu'r ffioedd presennol i £4.00 am 6 awr a £8.00 am 12 awr.

4.10 Rydym yn rhagweld gall y newid hwn gynhyrchu **£40,000** yn ychwanegol (Gros).

- 4.11 Byddwn wrth gwrs yn edrych ar yr ochr ymarferol ar gyfer rhoi'r newidiadau ar waith, gan gynnwys cyflwyno opsiynau talu amgen sydd yn ychwanegol i'r dull talu traddodiadol gydag arian parod.

Cynyddu pris Tocyn Parcio Blynyddol a Lleol meysydd parcio o £5 y flwyddyn

- 4.12 Mae'r Cyngor yn cynnig tocyn parcio blynyddol sydd yn galluogi deiliaid i barcio mewn unrhyw faes parcio arhosiad hir ledled y Sir heb gyfyngiad amser.
- 4.13 Bu i gost y tocyn parcio blynyddol gynyddu o £125 i £140 y flwyddyn yn 2021 yn unol ag argymhelliad o'r adolygiad strategaeth parcio. Yn flaenorol, doedd y prisiau heb gynyddu ers 2015.
- 4.14 Mae'r Cyngor hefyd yn cynnig tocyn parcio lleol i drigolion sydd heb lecyn parcio dynodedig i ddefnyddio maes parcio arhosiad hir sydd agosaf i'w cartrefi. Bu i gost y tocyn parcio lleol gynyddu o £60 i £70 y flwyddyn yn 2021 yn unol ag argymhelliad yr adolygiad strategaeth parcio. Yn flaenorol, doedd y prisiau heb gynyddu ers 2015.
- 4.15 Byddai gweithredu'r cynnydd pris fel sydd wedi ei gynnwys yng nghynlluniau arbedion corfforaethol yn golygu y byddai pris Tocyn Parcio Blynyddol yn cynyddu o **£140 i £145** (+3.6%) y flwyddyn a phris Tocyn Parcio Lleol o **£70 i £75** (+7%) y flwyddyn.
- 4.16 Teimlwn y byddai'r tocynnau hyn yn parhau i gynnig gwerth am arian ar ôl cynnydd i'r ffioedd – gweler isod ddadansoddiad yn seiliedig ar y ffioedd newydd arfaethedig:

	Cost Misol	Cost Dyddiol
Tocyn Parcio Blynyddol	£12.08	£0.40
Tocyn Parcio Lleol	£6.25	£0.21

Addasiad i Strwythur Ffioedd Arhosiad Hir Band 2

- 4.17 Bu i Aelodau Cabinet y Cyngor gymeradwyo strwythur ffioedd parcio newydd yn 2021 a chyflwyno gwelliant i'r argymhelliad drwy ymofyn i'r Cyngor leihau amser gorfodi meysydd parcio arhosiad byr. Newidiwyd o 9:00 - 17:00 i 10:00 - 16:30.
- 4.18 Roedd yr argymhelliad gwreiddiol i gyflwyno oriau gorfodi o 9:00 - 17:00 wedi ei gwtogi'n barod o 8:00 – 18:00.
- 4.19 Y penderfyniad terfynol gan Aelodau'r Cabinet oedd cwtogi'r oriau ymhellach i 10:00 - 16:30. Daeth y newidiadau i rym ym mis Mai 2021 gyda'r ddealltwriaeth bod yr Adran Amgylchedd yn monitro'r lefelau incwm yn agos iawn.
- 4.20 Er yn anodd iawn amcanu gwir ardrawiad ariannol y trefniadau, mae'r tueddiadau parcio cyn 10:00 ac ar ôl 16:30 yn argymhell ein bod yn pwysu tuag at yr achos gwaethaf yn nhermau colled incwm a amcanir, sef **£78,000**.

- 4.21 Teimlwn ein bod bellach mewn sefyllfa ble mae'n anorod cynnig ymestyn yr oriau gorfodaeth ym meysydd parcio arhosiad byr band 1 a 2 i 9:00 – 17:00.

Ymestyn Oriau Gorfodaeth Parcio ym Meysydd Parcio Arhosiad Byr y Cyngor

- 4.22 Er gwaethaf y gwaith o dderbyn cymeradwyaeth ac ymgynghori'n unol â'r drefn, derbyniwyd nifer o gwynion ynghylch y ffioedd newydd. Roedd rhan helaeth o'r cwynion yn cyfeirio tuag at y gost i barcio ym meysydd parcio arhosiad hir o fewn band 2 ble roedd penderfyniad wedi ei wneud i leihau'r nifer o opsiynau i ddau ffi yn unig – sef £5 am 12 awr a £10 am 24 awr.
- 4.23 Mynegwyd pryderon na fyddai'r ffioedd newydd yn fforddiadwy i bobl leol nac ychwaith yn cyfarch anghenion y bobl fyddai'n awyddus defnyddio'r meysydd parcio am gyfnod o lai na 12 awr.
- 4.24 Rhoddwyd ystyriaeth lawn i'r adborth a dderbyniwyd ar ôl i'r ffioedd newydd ddod i rym. O ganlyniad, penderfynwyd cyflwyno dau ffi newydd yn ychwanegol i'r ddau ffi presennol, sef £1 am 2 awr a £2 am 4 awr.
- 4.25 Roedd disgwyliad i'r strwythur ffioedd newydd yn ei ffurf wreiddiol gyfarch cyllideb y Cyngor. Wrth gwrs, cyfrifwyd y ffigyrau yn seiliedig ar yr oriau gorfodaeth a ffioedd gwreiddiol heb roddi ystyriaeth i'r newidiadau a gyflwynwyd wedi hynny.
- 4.26 Drwy gofio mai meysydd parcio arhosiad hir sydd dan sylw yma, rydym bellach yn argymhell gwaredu y ffi £1.00 am 2 awr yn gyfan gwbl a chynyddu'r ffi 4 awr o £2.00 i £2.50.
- 4.27 Drwy ddefnyddio'r un model a ddefnyddiwyd yn flaenorol ar gyfer amcanu incwm a drwy gyflwyno ffi sydd yn leiafswm o £2.50, rydym yn rhagweld gall y newid hwn gynhyrchu **£160,000** yn ychwanegol (Gros).
- 4.28 Mae copi o'r strwythur ffioedd arfaethedig llawn i'w weld yn **Atodiad A**.

5. Gorwariant yn y Gyllideb

- 5.1 Mae strategaeth parcio'r Cyngor, sydd yn cynnwys ein strwythur ffioedd ar gyfer meysydd parcio talu ac arddangos y Cyngor yn cael ei adolygu bob rhyw bum mlynedd.
- 5.2 Mae targed incwm sydd angen i'r gwasanaeth ei gyfarch drwy ffioedd parcio yn cynyddu'n flynyddol yn unol â chwyddiant. Caiff chwyddiant cyfansawdd ei ychwanegu ar darged incwm ffioedd parcio ar gychwyn pob blwyddyn ariannol.
- 5.3 Cadarnhawn bod targed incwm ar gyfer y flwyddyn ariannol bresennol 2024-25 yn cynnwys chwyddiant yn ogystal a'r cyfansymiau incwm ychwanegol sy'n deillio o'r cynlluniau arbed a gynigiwyd gan y gwasanaeth.
- 5.4 Isod gweler grynhoad o'r targedau incwm ers 2021-22:

	Cyllideb
2021/22	£2,381,880
2022/23	£2,506,260
2023/24	£2,690,350
2024/25	£2,937,020

- 5.5 Roedd cyfanswm yr incwm a gynhyrchwyd drwy ffioedd parcio ym mlwyddyn ariannol 2023-24 oddeutu £2.1 miliwn sydd tua £590k yn llai na'r targed.
- 5.6 Petai'r strwythur ffioedd parcio a'r nifer o bobl sydd yn defnyddio'r meysydd parcio yn aros yr un fath eleni, rhagwelir byddai'r gwasanaeth yn tangyflawni dros £870,000. Drwy gymeradwyo'r cynlluniau arbed uchod, byddai modd lleihau'r cyfanswm hwn i £730,000.
- 5.7 Er mwyn ceisio cadw i fyny gyda'r targed incwm blynyddol, gan ystyried nad yw'r ffioedd yn cynyddu yn flynyddol, yr unig ffordd i wneud hyn yw drwy gynyddu'r defnydd. Mae'r gwarged nawr yn afrealistig o ran faint o gynnydd yn nefnydd fyddai angen er mwyn cwrdd â hyn. Mae hyn gan ystyried fe fydd rhai o'n meysydd parcio mwyaf prysur yn llawn neu agos i fod yn llawn eisoes yn ystod cyfnodau brig
- 5.8 Golygai'r ffaith bod strwythur ffioedd parcio'r Cyngor wedi aros yr un fath ers 2021, a'r targed incwm sydd angen ei gyfarch yn parhau i gynyddu, iddi ymddangos bod cyllidebau'r gwasanaeth yn gorwario'n sylweddol yn erbyn y targed.

6. Ffordd Ymlaen

- 6.1 Rydym yn effro i'r ffaith bod cyfnod heriol iawn yn ein hwynebu a'i bod yn anorffod fod rhaid i'r Gwasanaeth Parcio, fel gwasanaethau eraill, gyfrannu tuag at lenwi'r bwloch ariannol sydd yn bodoli yng nghyllidebau'r Cyngor.

Cynlluniau Arbedion

- 6.2 Mewn ymateb i sefyllfa ariannol bresennol y Cyngor, mae bwriad bwrw mlaen gyda'r cynlluniau arbedion a gymeradwywyd gan y Cabinet yn 2023/24, sef 1) Cynyddu ffioedd parcio Pen y Gwryd a 2) Cynyddu pris tocyn parcio blynyddol a thocyn parcio lleol £5 y flwyddyn.
- 6.3 Byddwn yn cyflwyno'r cynlluniau arbedion sydd angen ystyriaeth bellach, sef 1) Addasiad i Strwythur Ffioedd Arhosiad Hir Band 2 a 2) Ymestyn Oriau Gorfodaeth Parcio ym Meysydd Parcio Arhosiad Byr y Cyngor ger bron Aelodau'r Cabinet a gofyn am gymeradwyaeth ym mis Hydref 2024 yn y gobaith o alluogi'r gwasanaeth i fwrw mlaen gyda'r trefniadau a chychwyn gwireddu'r cynnydd mewn incwm posibl.

Gorwariant yn y Gyllideb

- 6.4 Mae ffioedd parcio yn cynhyrchu incwm sylweddol i'r Cyngor. Er hyn, mae'n rhaid wynebu'r ffaith nad yw'r strwythur ffioedd presennol bellach yn addas ar gyfer cyfarch y targed incwm.

6.5 Yn seiliedig ar y strwythur ffioedd presennol a petai defnydd ein meysydd parcio yn aros yr un fath, rydym yn amcanu byddai cynyddu'r holl ffioedd yn cynhyrchu'r lefelau incwm isod;

	Cyfanswm Incwm Ychwanegol Blynyddol (amcan)
1. Cynyddu'r holl ffioedd 30%	£600,000
2. Cynyddu'r holl ffioedd 40%	£800,000

6.6 Er mwyn cyfarch targed incwm sydd wedi'i osod ar gyfer eleni, rydym yn rhagweld byddem angen cynyddu'r holl ffioedd rhwng 30% a 40%.

6.7 Mae **Atodiad B** yn arddangos y strwythur ffioedd bresennol gydag ychwanegiadau o 30% a 40%.

6.8 Mae **Atodiad C** yn arddangos y strwythur ffioedd arfaethedig gydag ychwanegiadau 30% a 40%.

6.9 Os am gyfarch cynnydd chwyddiant disgwylidig hyd at blwyddyn ariannol 2028-29 amcan gyfrir byddai angen codi'r holl ffioedd **40%**.

6.10 Mae'r opsiynau canlynol yn cynnig ffordd o leddfu ardrawiad mor sylweddol ar ein strwythur ffioedd parcio:

- Lleihau'r targed incwm sydd yn ddisgwylidig gan ffioedd parcio
- Rhewi'r cyfradd chwyddiant rhwng adolygiadau fel nad ydi'r targed incwm yn cynyddu'n flynyddol
- Cynyddu'r ffioedd parcio yn flynyddol yn hytrach na bob 5 mlynedd (ar gyfartaledd)

6.11 Mae'r opsiynau hyn yn cynnig manteision yn nhermau cynorthwyo'r gwasanaeth i gyfarch targed sydd yn fwy cyraeddadwy. Er hyn, mae'n bwysig bod yn effro i'r ffaith byddai sgil effaith yr opsiynau hyn yn golygu bod angen i'r Cyngor gyfarch y diffyg ariannol mewn ffordd amgen.

6.12 Mae'r Gwasanaeth Parcio'n monitro'n rheolaidd sut mae cwsmeriaid yn talu am barcio, boed hynny trwy beiriannau talu neu ap symudol. Mae'r monitro parhaus hwn yn caniatáu i ni ddeall dewisiadau a thueddiadau cwsmeriaid, gan sicrhau y gallwn addasu ein gwasanaethau i ddiwallu eu hanghenion yn effeithiol.

6.13 Yn ystod 2023-24, cafodd 55% o holl daliadau am barcio eu gwneud drwy'r Ap ffôn symudol (Paybyphone) a'r 45% sydd yn weddill yn cael eu gwneud drwy'r peiriannau talu ac arddangos.

6.14 Drwy werthuso'r defnydd o wahanol ddulliau talu, gallwn nodi cyfleoedd i symleiddio gweithrediadau a lleihau costau. Er enghraifft, os oes symudiad sylweddol tuag at daliadau digidol trwy ap, gallem ystyried lleihau nifer y peiriannau talu, gan arwain at arbedion ar gostau cynnal a chadw a gweithredu. Ar y llaw arall, os yw peiriannau talu'n parhau i fod yn boblogaidd, byddai sicrhau eu bod yn gyfoes ac yn hawdd eu defnyddio'n hanfodol.

6.15 Yn y pen draw, ein nod yw cynnig y gwasanaeth gorau posibl i gwsmeriaid mewn ffordd sy'n hawdd i'w defnyddio ac yn gost-effeithiol. Trwy wneud penderfyniadau gwybodus yn seiliedig ar y data a gasglwn, gallwn wneud y Gwasanaeth Parcio'n fwy effeithlon, gwella'r profiad cwsmeriaid, ac arbed arian i'r Cyngor, gan gyfrannu at effeithlonrwydd a chynaliadwyedd cyffredinol y gwasanaeth.

7. Ymgynghori

7.1 Byddwn yn cyflwyno adroddiad gerbron Aelodau'r Cabinet ym mis Hydref 2024 a phetaent yn cymeradwyo'r argymhellion cysylltiedig a chynyddu ffioedd parcio, byddem yn cynnal cyfnod ymgynghori yn unol â Rheoliadau Gorchmynion Traffig Awdurdodau Lleol – Rheoliad 25 (Cymru a Lloegr).

7.2 Fel rhan o'r cyfnod ymgynghori, mae'n hanfodol i'r Cyngor hysbysebu'r newidiadau arfaethedig yn y papurau newydd lleol yn ogystal ag arddangos y wybodaeth (cynnwys y ffioedd newydd) mewn safleoedd amlwg yn y meysydd parcio a cheir eu heffeithio.

7.3 Pan ddaw'r amser i weithredu'r newidiadau, gallwn ddiweddarau'r ffioedd parcio drwy ddefnyddio'r system swyddfa gefn MI Office. Ni fydd ffi yn gysylltiedig â hyn.

7.4 Byddwn yn ceisio ail ddefnyddio cyn gymaint o'r arwyddion tariff a phosibl drwy brynu sticeri pwrpasol gyda'r ffioedd newydd yn hytrach na phrynu arwyddion newydd. Byddwn yn rhagweld costau o oddeutu £1,000 ar gyfer diweddarau'r arwyddion.

7.5 Byddwn yn hyrwyddo'r tocynnau parcio blynyddol a lleol rydym yn ei gynnig am brisiau rhesymol. Mae nifer o drigolion a phobl sydd angen defnyddio ein meysydd parcio'n ddyddiol yn manteisio ar y cyfle i brynu tocyn sydd yn profi'n werth am arian.

8. Deddf Llesiant Cenedlaethau'r Dyfodol (Cymru) 2015

8.1 Dylai'r cynnig i godi ffioedd parcio gyd-fynd â saith nod llesiant y Ddeddf:

Cymru ffyniannus: Drwy reoli ffioedd parcio'n ofalus, gall y cyngor gefnogi twf economaidd drwy annog pobl i ddefnyddio cyfleusterau a gwasanaethau lleol, gan gynhyrchu refeniw y gellir ei ail-fuddsoddi mewn gwelliannau seilwaith.

Cymru gydnerth: Gall ffioedd parcio uwch annog pobl i ddefnyddio trafndiaeth gyhoeddus, lleihau defnydd ceir, ac o ganlyniad lleihau allyriadau carbon. Mae hyn yn helpu i ddiogelu'r amgylchedd ac yn cyfrannu at gymuned fwy gwydn yn wyneb newid yn yr hinsawdd.

Cymru iachach: Gall annog dewisiadau amgen i deithio mewn ceir, megis cerdded, beicio, neu ddefnyddio trafndiaeth gyhoeddus, hyrwyddo ymarfer corff a lleihau llygredd aer, gan gyfrannu'n bositif at iechyd y cyhoedd.

Cymru sy'n fwy cyfartal: Rhaid i'r polisi ystyried yr effaith ar grwpiau cymdeithasol-economaidd gwahanol. Dylid sicrhau nad yw unrhyw gynnydd mewn ffioedd yn effeithio'n anghymesur ar unigolion incwm isel a bod opsiynau trafndiaeth fforddiadwy ar gael o hyd.

- 8.2 Byddwn hefyd yn hyrwyddo'r tocynnau parcio blynyddol a lleol sydd ar gael am brisiau rhesymol. Mae nifer o drigolion a phobl sydd angen defnyddio ein meysydd parcio'n ddyddiol yn manteisio ar y cyfle i brynu tocyn sydd yn profi'n werth am arian.

Cymru o gymunedau cydlynus: Gall polisiâu parcio wedi'u rheoli'n briodol wella bywiogrwydd canol trefi drwy leihau tagfeydd a gwneud ardaloedd yn fwy hygrych a dymunol i breswylwyr ac ymwelwyr fel ei gilydd.

Cymru sy'n gyfrifol ar lefel fyd-eang: Trwy gymryd camau i leihau dibyniaeth ar geir, gall y cyngor gyfrannu at ymdrechion byd-eang i frwydro yn erbyn newid yn yr hinsawdd, gan adlewyrchu ymrwymiad i gynaliadwyedd byd-eang.

Cymru â diwylliant bywiog lle mae'r Gymraeg yn ffynnu: Dylai strategaethau parcio hefyd ystyried eu heffaith ar fynediad at ddigwyddiadau a lleoliadau diwylliannol, gan sicrhau bod y Gymraeg a diwylliant Cymru'n cael eu hyrwyddo a'u cadw.

- 8.3 Dylai'r cynnig i godi ffioedd parcio gyd-fynd â'r pump modd o weithio a nodir yn y Ddeddf:

Rydym yn **cynnwys** trigolion a defnyddwyr gwasanaeth drwy dderbyn adborth. Mae hyn yn cynnwys ceisiadau, cwynion, sylwadau a mewnbwn arall gan y cyhoedd, defnyddwyr a darpar ddefnyddwyr ein meysydd parcio ar sail barhaus.

Rydym yn **cydweithio** gyda'r rhanddeiliaid allweddol eraill. Mae hyn yn cynnwys Awdurdodau Lleol Arall, Heddlu Gogledd Cymru, Parc Cenedlaethol Eryri, Llywodraeth Cymru a Thrafnidiaeth Cymru.

Ar lefel weithredol rydym yn cyd-weithio gyda 10 Awdurdod Lleol arall yng Nghymru fel aelodau o PPCC (Partneriaeth Prosesu Cosbau Cymru) i gefnogi'r gweithrediad gorfodaeth drwy ddelio â heriau, taliadau a phrosesu'r holl rybuddion talu cosb a gyflwynir.

- 8.4 Ar lefel strategol rydym yn rhoi mewnbwn i'r gwaith o ddatblygu'r Cynllun Trafnidiaeth Rhanbarthol drwy'r Cydbwyllgor Corfforaethol.

Rydym yn edrych i **atal** problemau rhag codi neu waethygu yn y dyfodol drwy gydweithio yn agos gyda'r rhanddeiliaid allweddol eraill. Y bwriad yw optimeiddio'r defnydd o'r meysydd parcio i hwyluso mynediad a cefnogi cymunedau gwydn a economi leol byrlymus a llwyddiannus.

Rydym yn ystyried yr **hirdymor** drwy'r Cynllun Trafnidiaeth Rhanbarthol a gwaith y Cydbwyllgor Corfforaethol. Mae hyn yn cynnwys rhoi ystyriaeth i sut mae strategaeth parcio a strwythur ffioedd parcio yn medru dylanwadu yn gadarnhaol ar dewisiadau a ymddygiadau teithio. Mae rhaglen ar waith i leoli pwyntiau gwefru ar gyfer ceir trydan yn ein meysydd parcio. Mae modd i dalu am barcio mewn meysydd parcio drwy Ap sydd yn adlewyrchiad yn newidiadau technegol yn ogystal a'r modd mae cwsmeriaid am dalu i barcio. Mae'r modd yma o dalu yn gynyddol boblogaidd.

- 8.5 Mae natur y maes gwaith yn golygu angen i **integreiddio** gyda chyrrff cyhoeddus eraill sydd yn cynnwys Awdurdodau Lleol eraill, Heddlu Gogledd Cymru, Parc Cenedlaethol Eryri a Llywodraeth Cymru.

Rydym yn ystyried y berthynas rhwng y ddarpariaeth parcio ar y stryd ag oddi ar y stryd fel un pecyn integredig gyda'r bwriad o gwrdd a disgwyliadau a dyheadau wahanol rhanddeiliaid pan mae rhain weithiau yn gwrthdaro.

- 8.6 Dylai'r Pwyllgor Craffu sicrhau bod y penderfyniad i godi ffioedd parcio'n cael ei wneud gyda golwg holistig, gan ystyried nid yn unig y manteision ariannol uniongyrchol ond hefyd yr effeithiau hirdymor ar lesiant cenedlaethau presennol a'r dyfodol.

9. Effaith ar Nodweddion Cydraddoldeb, y Gymraeg a'r Dyletswydd Economaidd-Gymdeithasol

- 9.1 Mae'r Gwasanaeth eisoes wedi rhoi ystyriaeth, ac yn cydnabod yr angen am asesiadau effaith (e.e. Iaith a Chydraddoldeb), a bydd asesiadau yn cael eu datblygu a'u defnyddio yn ystod y broses ymgynghori ymgysylltu â'n cymunedau ar bwntiau penodol ac ar gyfer diweddaru'r Asesiadau Llesiant.

10. Camau Nesaf

- 10.1 Byddwn yn cyflwyno adroddiad ger bron Aelodau Cabinet y Cyngor ym mis Hydref 2024.

Atodiadau

- Atodiad A: Copi strwythur ffioedd arfaethedig (newid band 2)
Atodiad B: Strwythur ffioedd bresennol gydag ychwanegiadau o 30% a 40%
Atodiad C: Strwythur ffioedd arfaethedig gydag ychwanegiadau 30% a 40%